

HADISI KOJI SPOMINJU BROJ TRI

Neka je hvala Allahu, dž.š., Gospodaru svih svjetova. Neka su salavat i selam na Poslanika Muhammeda, s.a.v.s., njegovu časnu porodicu, ashabe i sve sljedbenike.

Braćo moja u Dini Islamu! Zadnju hutbu u mjesecu Rebiul-evvelu posvetit ćemo hadisima Božijeg poslanika Muhammeda, s.a.v.s., koji spominju broj tri. Takvih hadisa ima preko pedeset, ali mi ćemo se danas osvrnuti na samo par njih i pokušati iz njih uzeti pouku.

Govoreći o predznacima Smaka svijeta Poslanik, s.a.v.s., je rekao: "***Kada se pojavi troje, nijednom čovjeku neće biti od koristi to što će tada povjerovati, ako prije nije vjerovao ili ako nije kao vjernik kakvo dobro uradio: izlazak Sunca sa zapada, pojava Dedžala i izlazak životinje iz zemlje.***" (Hadis sahih, bilježe ga Muslim i Tirmizi)

Ovim hadisom nas Poslanik, s.a.v.s., upozorava da čuvamo i gajimo svoj iman, te da požurimo sa činjenjem dobrih djela prije nego što se pojave spomenuta tri velika predznaka Smaka svijeta. Jer kada se oni pojave onda će svi ljudi vidjeti šta je istina i povjerovat u nju te požuriti da prihvate vjeru. Međutim, tada će biti prekasno. Uzvišeni Allah im neće ukabuliti.

U drugom hadisu se Poslanik, s.a.v.s., zaklinje za tri stvari, a ako se on zbog nečega zaklinje onda je to sigurno važno. On poručuje: "***Zaklinjem se da su tri stvari istinite: sadaka ne umanjuje čovjekov imetak; čovjeku kojem bude učinjena nepravda pa je on strpljivo podnese Allah će zbog toga uvećati čast i ugled; i čovjek neće otvoriti vrata prosjačenja a da mu Allah zbog toga neće otvoriti vrata siromaštva.***" (Hadis sahih, bilježe ga Ahmed i Tirmizi)

Ovim hadisom Poslanik, s.a.v.s., bodri ljude na sadaku i poziva ih da ne slušaju prokletog šejtana koji ih plaši da će davanjem sadake osiromašiti, da će uskratiti pravo svojoj porodici ili da će biti na gubitku. Jer upravo je to razlog zbog kojeg se neki ljudi ustručavaju od davanja sadake ili na kraju dadnu manje nego što su u prvi mah poželjeli.

Zatim, bodri ljude na sabur u pretrpljenoj nepravdi, jer je nepravde uvijek bilo i bit će, ali je zato Uzvišeni Allah tu da nepravdu ispravi, da štetu nadoknadi te da Svojom nagradom nagradi onoga koji osaburi.

I, također, odvraća ljude od prosjačenja, odnosno, bodri ih da ustanu za nafakom, jer je nafaka svakome zagarantovana ali neće doći sama. Za ništa se dobiva ništa, za uloženi trud Uzvišeni Allah će prema Svojoj volji nagraditi, a za prosjačenje slijedi kazna u vidu siromaštva i poniženja.

U trećem hadisu Poslanik, s.a.v.s., ukazuje na vrijednost i jačinu dove, govori o osobama čije se dove ne odbijaju te upozorava ljude da paze kako se odnose prema tim osobama. Rekao je: "***Trojici se dova ne odbija: dova roditelja za dijete, dova postača i dova mazluma.***" (Hadis hasen, bilježe ga Ebu Hasen b. Mehrvejh i Dija)

Dova roditelja za dijete je jako oružje i velika nada za roditelje, pogotovo ako su iskušani neposlušnom djecom. S druge strane, njihova dova može da bude i kletva, ako djeca svojim lošim ponašanjem i nepriličnim odnosom prema svojim roditeljima budu uzrok da roditelji izgovore teške riječi protiv njih. Zato, braćo moja, vi koji još uvijek imate živog jednog ili oba roditelja, znajte da ste vi još uvijek djeca, nebitno koliko godina imate, i zato pazite kako se odnosite prema najvažnijim osobama u vašem životu, preko kojih je i vama Uzvišeni Allah život dao. I znajte dobro da za neposlušnost prema roditeljima stiže Allahova kazna još na ovome svijetu. A na onome svijetu posebno.

A osim roditeljima, Uzvišeni Allah je posebnu počast ukazao i postaču te onome kome je nepravda učinjena, čije dove također mogu da postanu kletve. Pogotovo kada je u pitanju osoba kojoj je nepravda učinjena, jer između te dove i Uzvišenog Allaha nema apsolutno nikakve prepreke.

I za kraj, spomenut ćemo hadis u kome Poslanik, s.a.v.s., spominje tri odlike licemjera (munafika). Rekao je: "***Kod koga se nađe troje on je licemjer, pa makar i postio i klanjao i govorio 'Ja sam musliman.': kada govori – laže, kada obeća – ne ispuni i kada nešto uzme u emanet – pronevjeri.***" (Hadis sahih, bilježe Rusteh i Ebu Šejh)

Ovim hadisom Poslanik, s.a.v.s., upozorava na najgoru vrstu ljudi – licemjere. To su oni koji se kriju iza svoje vjere, koji se drugima prikazuju kao vjernici i hvale se svojim dobrim djelima kako bi prikupili simpatije drugih ljudi i vjernika. Ali u stvarnosti oni su prevaranti, koji svojim ponašanjem uništavaju svoja dobra djela, pokazuju da u njima nema imana te dokazuju da vjera nije za svakog insana. Takvih je, nažalost, danas veliki broj – koji su dali vjeru za večeru; koji misle da će moći vječno da varaju ljude i od toga izvlačiti koristi; koji misle ako su prevarili ljude da mogu prevariti i Uzvišenog Allaha. E pa varaju sami sebe.

Braćo moja, koristim priliku da vam uputim tri poziva:

- Pozivam sve džematlije sa pravom glasa da iskoriste svoje glasačko i građansko pravo i u nedjelju izađu na izbore te na taj način preuzmu odgovornost i dadnu doprinos za bolje sutra. I znajte dobro da i izlazak i ne izlazak na izbore imaju svoje posljedice.

- Pozivam vas da sutra, akobogda, dođete na akšam-namaz u našu džamiju i da svojim prisustvom uveličate mevludsku manifestaciju, koju organizujemo u čast našeg Miljenika i Poslanika Muhammeda, s.a.v.s.

- I pozivam sve vas koji ste u mogućnosti da danas nakon džume uzmete učešće u sergiji, koju organizujemo s ciljem pomoći pri izgradnji i isplati prostorija u džematu Braunau.

Da vam Dragi Allah podari svako dobro. Amin.